

**Date – 24/06/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Chief Minister Pu Lalduhoma chuan NDA an zawm loh thu leh inlaichhina erawh tha tak an neih thu a sawi.
2. Vawiin khan Mizoram Youth Commission (MYC) chuan Drishti IAS coaching institute nena tangkawpa an buatsaih 'Free UPSC Coaching Programme' an hawng.
3. Assam sawrkar chuan tuilian tuar mai thei dinhmuna a din a avangin sawrkar thuneitute inralring turin a hriattir
4. Kolkata-a godown sak lai a chim avangin mi pathum an thi.

<><><>

**CM**

Chief Minister Pu Lalduhoma chuan NDA an zawm loh thu leh inlaichhina erawh tha tak an neih thu a sawi.

He thu hi vawiin-a CMO Conference Hall-a chanchinbumite zawhna chhangin, tun hma zawng kha chuan National Party Mizoram-ah a awm loh avang khan, helai tual to party rorelna chang apiangin Central-ah ruling party an zu tlawp pui zel a, mahni ram tan opposition pawl lo nih ngawt ai chuan a hlawk tih a chiang niin a sawi. Chief Minister chuan an sorkar tirh atangin Prime Minister te, Home Minister te'n an mahni zawm turin an sawm tih a sawi a, thawhhona tha tak an neih thu leh official-a an zawm kher a ngai rih lo tia a hrih thu a sawi. Media thenkhatin zawm tawh anga an sawi chu a dik tawk lo tih a sawi a, PAC meeting agenda-ah hemi chungchang hi tel nia thenkhatin an ziah chungchangah Party-ah PAC-ah a ni emaw OB meeting-ah a ni emaw, Executive-ah a ni emaw engtik lai mahin NDA zawm chu an la dah ngai lo tih a sawi a ni.

**Byte of Chief Minister**

Chief Minister chuan Mizoram Sawrkarin sumdawwna kawng hrang hrang tihawlsamna tura hmalakna 'Compliance Reduction & Deregulation Reforms Programme' kalpui mek chungchang pawh sawiin he hmalakna hi Mizoram economy thang chho zel tur leh mipuite tana hna siambelhna kawnga lungthu pawimawh tak a nih tur thu a sawi a. Mizoram Sawrkar chuan sawrkar laipui hmalakna zinga pakhat, Compliance Reduction and Deregulation Reforms

Programme hnuaiia dan leh hrai tlo lo leh rit lutukte tihtlem a, kalphung tihawlsam te, inrintawna thupuia hmang chungang rorelna kalpui te, leh sumdawna lama hmasawna leh investment, entrepreneurship leh ei leh bara than theihna tura environment tha siam tumna chu nasa takin a kalpui mek tih a sawi a. Commerce, Industries, Geology & Mining department chu Nodal Department niin, anni hian Mizoram sawrkar hnuaiia department leh agency hrang hrangte he hmalaknain a huamte enzuiin an kaihruai dawn tih a sawi a ni.

<><><>

## **STATE FELICITATION OF KAYAKALP AWARDEES MIZORAM**

Vawiin khan National Health Mission, Health & Family Welfare Department buatsaih Kayakalp Award Mizoram (2025-2026) lawmman chu BSI Hall, Bible House, Khatlaah semchhuah a ni a, Health Minister Pi Lalrinpui'n a hmanpui.

Minister chuan hospital leh health facility a thawktute inpekna leh thawhrimna avanga programme an hmang thei chu lawmawm a tih thu a sawi a. India ram pumah faina ngaih pawimawh a nih thu leh, Swatch Bharat campaign te pawh kalpui a nih thin thu a sawi a. Kayakalp pawh hi he Swatch Bharat initiative hnuaiia mi niin, Kayakalp Scheme in a tum ber chu Cleanliness – Faina hi a nih thu a sawi a. Mizoram chhunga damdawi in hrang hrangte, Sub-Centre atanga PHC, District Hospital thlengin an faiin an thianghlim hle tih a sawi a. Thawktute inpekna, thawhhona tha avanga lo hlawhtling thei a ni a, a ropui hle a ni, a ti.

Minister chuan Kayakalp kalpui a nihna chhan pakhat chu – mipuite hian Indian Constitution hnuaiia Right to Health an neih vang a ni, a ti a. Constitution chuan Right to Live chu mi zawng zawng dikna chanvo atan pek a ni a ti a, Right to Live hnuaiia pawimawh ber te zinga mi chu Right to Health a nih thu a sawi a. Mipuite'n hospital fai leh thianghlima inentir chu an dikna chanvo a ni a, chumi tur chuan thawktute hmalakna leh tanrualna a pawimawh tih a sawi bawk a ni.

<><><>

## **ICFAI UNIVERSITY AND OASIS COLLEGE SIGNS MOU**

ICFAI University, Mizoram leh Oasis College, Kangpokpi, Manipur chuan vawiin khan thawhona thuthlung chhinchiah tlak tak- Memorandum of Understanding an ziaak .

MoU hi Aizawl-a ICF AI University-a Office Chamber of Vice-Chancellor-ah ziah a ni a, He memorandum of agreement hian a tum chu, zirtirtute an thiamna hman ho chungchang ah seminar, conference leh workshop te leh zir na tih changtlunna tur in hma lak ho tum a ni a, OASIS College Kangpokpi, Manipur a an zirtirtu te ah Doctorate degree (Ph D) zir duh an awm chuan ICF AI University Mizoram chuan zir tur a an tlin phawt chuan UGC norms angin admission a lo pe ang , Asst. Professor, Associate Professor te OASIS college KANGPOKPI ah an awm chuan leh an mahni in rem an tih chuan Co Supervisor ICF AI University Mizoram ah an ni thei ang a , Zirna in pahnih a tang hian thiamna a tana hlawkpuina tur hrang hrang chungchangah thawh ho tum a niin, hei hian Mizo hnahtlakte in unauna ah leh state pahnihte thawh ho naah nasa takin rah tha a chhuah beisei a ni. Hei bakah hian zirna kawngah joint research leh publications te tih ho tum a ni a, Electronic resource leh digital hmanga thil dah that chungchangte a tul anga in zirtir tawn tum a ni bawk.

He Memorandum of Understanding hi Prof. Ginlianlal Buhril, Vice chancellor ICFAI University Mizoram, Dr David Lawmzuala Registrar ICFAI University Mizoram, Thanglenmang Kipgen Principal OASIS College, KANGPOKPI, Dr. Thathang Vaiphei Chairman Board of Management Oasis College Kangpokpi te an sign a, Prof. J Dougel, Professor department of Political Science Mizoram University chuan hriatpuiin hming a ziak bawk a ni.



## **MYC FREE UPSC COACHING**

Vawiin khan Mizoram Youth Commission (MYC) chuan Drishti IAS coaching institute nena tangkawpa an buatsaih 'Free UPSC Coaching Programme' an hawng.

Hawna inkhawm, MYC Auditorium, MINECO, Khatla-a hawna inkhawm hi Chief Secretary Pu Khilli Ram Meena in a telpui a. Chief Secretary chuan thu sawiin, March 2025-a Union Home Minister Pu Amit Shah-in Mizoram a rawn tlawh khan, Mizoram-in harsatna hrang hrang a tawh mekte chu sawi ho turin Mizoram-a Civil Society Organisation-te nen an inkawm a ni tih a sawi a. Chumi inkawmhona atang chuan Mizoram atanga IAS tling hnukung ber pawh kum 2014-a tling niin, Mizoram atanga All India leh Central Civil Services-a inziak tling an tlem hle tih a lang chhuak tih a sawi a. He thu hi ngai pawimawhin State official-te chuan ngaihtuahna leh sawihona an neih hnuah tuna Free UPSC Coaching Programme hi an duang chhuak tih sawiin, India rama Coaching Institute hlun leh changtlung berte zinga mi Drishti IAS, New Delhi chu thlan a ni, a ti.

MYC Chairman Pu Malsawmzuala Ralte pawhin thu sawiin, Mizoram-ah hian Central Civil Services exam-a hlawhtlinna thlen tumin Kohhran, Sawrkar leh khawtlang mite chuan an theih ang angin an thawk a, mahse hlawhtlinna chu mimal tumna leh thawh rimna hmang chauhin a thleng thei tih a sawi a. Zirlaite chu an vanneihzia hrihlin he coaching programme hi hmang tangkai a, an theihtawp chhuah turin a fuih a, an kal zelna tur atan duhsakna a hlan bawk a ni.

## **VC of Hruaia, PTC**

*UPSC hnuaia Civil Services Examination-ah Mizo thalaite an luh hnem lehzual theihna turin, Mizoram Sawrkar chuan Mizoram Youth Commission kaltlangin thla 12 chung a thlawna UPSC Coaching kalpui tura ruahmanna thar a siam a. Hemi atan hian India rama Coaching Institute hlun leh changtlung berte zinga mi Drishti IAS, New Delhi nen thawhdunna thuthlung an ziak a ni. Uluk taka screening process neih a nih hnuah UPSC exam tum mi 100 thlan chhuah an ni a, he coaching program hnuaia class-te hi 24th March 2026, atang khan kal tan a ni. He programme hnuaiah hian General Studies class chu offline-in neih a ni a, Optional subject paruk -Political Science & International Relations, Geography, Sociology, Anthropology, History leh Public Administration chu online-in zirtir a ni bawk. Hemi bakah hian, Aizawl pawna mi zirlaite tan hostel facility pawh siam a ni.*



## **ART & CULTURE MINISTER GRACES LIBRARY SEMINAR**

Art & Culture Minister Pu C. Lalsawivunga'n library chu hriatna tipungtu, mihringte hmasawna kawng zawhtir theitu, zirna leh thiamna lama puitu a nih thu a sawi.

Vawiina 14th State Level Library seminar & training for government recognised libraries, vawiin leh naktuk chhunga hman tur Chanmari Y.M.A hall, Aizawla a telpuinaah he thu hi a sawi a. Minister chuan sawrkarin library-te hmasawna tur a ngaipawimawh tih sawiin, India ram pum huapa Public Library te tih hmasawna tur atan Ministry of Culture hnuai autonomous organization Raja Rammohun Roy Library Foundation (RRRLF) chuan scheme hrang hrang kaltlangin tanpuina a pe chhuak thin tih a sawi a. Minister chuan Building Grant cheng nuai 6 zelin NGO Library 137 te'n an dawng tawh tih sawiin Steel Book Rack (Godrej) pawh Library 426-ah sem tawh a nih thu a sawi a. Kum tin recognised NGO Library te hnenah lehkhahu thar hrang hrang sem chhuah thin a nih thu sawiin kum hmasaah Computer tha tak mai Library 34-ah sem a nih thu leh, digital hmasawna nen library service tihchangtlunna atan a tangkai hle thu a sawi a ni.

Mizoram Library Association President Dr.Lalbiaksanga Hnamte chuan kum 1987-a YMA General Conference-ah YMA Branch zawng zawngin Library hawn vek tur tih an pass angin tunah hian veng tin khaw tin-ah Library awm lohna a awm tawh lo tih a sawi. Library enkawltute leh Association te chuan kum 1993-a Assembly in a lo pass tawh Mizoram Public Library Act 1993 chu tihlawhtlin ngei a nih theih nan theitawp chhuah sak turin Art & Culture Department Minister Pu C.Lalsawivunga a ngen a. He Act hi tihlawhtlin a nih chuan Library chu Department hrang, Directorate ni tawh in, District leh Sub Division te leh Villlage level ah Library tha tak tak dah a ni anga, sorkarin hneh takin a enkawl tawh dawn tih sawiin, non-formal education centre tha tak Mizoramin a nei thei tawh dawn a, sorkar lakah beiseina sang tak an neih thu a sawi a ni.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### **ASSAM FLOOD**

Assam sawrkar chuan tuilian tuar mai thei dinhmuna a din a avangin sawrkar thuneitute inralring turin a hriattir. Arunachal Pradesh-ah ruah a sur nasat avangin lui tui a lian nasa hle a. Hei vang hian Assam-a district thenkhat Dhemal, Lakhimpur, Biswanath leh Sonitpur ah te tun atanga ni hnih thum chhungin tuilian thleng thei reng anih thu IMD chuan a sawi a. SDRF, NDRF leh emergency-a thawkchhuak thei turte chu inralring tura tih an ni a. Hmun hniam lai leh tuilen theihna hmuna chengte chu inralring tur leh sawrkar thurawnte ngaichang tura hrilh an ni bawk a ni.

<><><>

#### **KOLKATA**

Kolkata-a godown sak lai a chim avangin mi pathum an thi. Vanduinna thlenna hmun hi Taratala kianga thleng a ni a. Mi pangain hliam an tuar a, SSKM damdawiinah hruai an ni a. State Minister for Urban Development and Municipal Affairs Agnimitra Paul chuan a hmun thleng nghalin chhanchhuah hna thawh dan a

vil nghal a. NDRF, Police, fire and emergency services leh tualchhung miten chhanchhuah hna ngawrh takin an thawk a. Union Minister of Ports, Shipping and Waterways Sarbananda Sonowal chuan vanduaina thleng chu pawl atih thu a sawi a. Chhanchhuah hna pawh kalpui mek anih thu sawiin mi thenkhat chu dam taka chhanchhuah an ni a ti a.

